



KEMENTERIAN PERPADUAN NEGARA

TEKS UCAPAN

**YB DATUK AARON AGO DAGANG
MENTERI PERPADUAN NEGARA**

**SEMPENA
MAJLIS PERASMIAN
PERAYAAN SONGKRAN KAMPUNG TASEK 2025**

**13 APRIL 2025 (AHAD)
11.30 PAGI**

**DEWAN SONGKRAN, KAMPUNG TASEK
PENGKALAN HULU, PERAK DARUL RIDZUAN**

Salam Sejahtera dan Salam Perpaduan.

****Salutasi terkini akan dikongsikan kemudian***

PENDAHULUAN

1. Terlebih dahulu, saya ingin merakamkan penghargaan kepada **Persatuan Siam Malaysia serta masyarakat Pengkalan Hulu** atas penganjuran **Perayaan Songkran Peringkat Kebangsaan** bersama dengan Kementerian Perpaduan Negara.
2. **Perayaan Songkran adalah perayaan utama dan yang penuh bermakna dalam kalendar masyarakat Bumiputera Siam di Malaysia yang menandakan kedatangan tahun baharu dengan penuh kesyukuran dan kegembiraan.**
3. Saya difahamkan bahawa sambutan **Songkran di Kampung Tasek telah berlangsung sejak 49 tahun yang lalu dan pada kali ini adalah sambutan yang ke-50 tahun.** Ini membuktikan bahawa masyarakat Siam di Malaysia mempunyai warisan budaya yang kukuh serta terus dipertahankan dari generasi ke generasi. Tahniah atas usaha ini!

SONGKRAN SIMBOL KEPELBAGAIAN

Hadirin yang saya kasihi sekalian,

4. Perayaan Songkran adalah salah satu daripada warisan budaya yang kaya yang kita miliki di Malaysia. Sebagai sebuah negara yang kaya dengan pelbagai tradisi dan amalan, adalah **menjadi tanggungjawab kita untuk memelihara warisan ini agar ia tidak hilang ditelan zaman.**
5. **Songkran memberi kita peluang untuk mengenali dan menghargai tradisi masyarakat Siam**, yang telah wujud selama bertahun-tahun. Tradisi ini bukan sahaja memberi kita pemahaman yang lebih mendalam tentang kehidupan masyarakat Siam, tetapi juga mengajak kita untuk lebih menghargai nilai-nilai murni seperti kasih sayang, dan hormat dalam kehidupan seharian.
6. Sebagai rakyat Malaysia, kita harus menghargai setiap warisan yang dimiliki oleh pelbagai kaum di negara kita. **Warisan budaya ini adalah jambatan yang menyatukan kita sebagai satu bangsa, tanpa mengira latar belakang etnik, agama, dan budaya.** Memelihara warisan budaya adalah tugas kita bersama, untuk memastikan bahawa generasi akan datang dapat mewarisi

dan merasai keindahan nilai-nilai yang telah ditinggalkan oleh nenek moyang kita.

KERAJAAN KOMITED MEMELIHARA BUDAYA

Hadirin yang saya hormati sekalian,

7. Untuk makluman, Kerajaan MADANI di bawah pimpinan YAB Dato Seri Anwar Ibrahim, Perdana Menteri telah mengumumkan peruntukkan sebanyak **RM 1 Juta melalui Bajet MADANI 2025 kepada usaha memelihara budaya dan bahasa kaum minoriti Siam di Malaysia.**
8. Ini adalah langkah penting bukan sahaja untuk memperkukuh **perpaduan dan pembinaan Negara Bangsa**, tetapi juga untuk memastikan bahawa **semua kaum di Malaysia, termasuk minoriti, mendapat pengiktirafan yang sewajarnya** terhadap sumbangan mereka dalam membentuk negara ini. Kerajaan MADANI memahami bahawa kepelbagaian budaya adalah kekuatan kita, dan setiap kaum berhak untuk terus meraikan tradisi mereka dalam suasana yang aman dan harmoni.
9. Selain itu, **Kementerian Perpaduan Negara (KPN) juga terus memperkukuh integrasi sosial menerusi pendidikan dan penglibatan belia** melalui program-program kesedaran bagi

memastikan setiap lapisan masyarakat dapat mengenali dan menghargai warisan budaya pelbagai etnik di Malaysia.

10. Sehubungan dengan itu, saya mencadangkan agar Kementerian menerusi Jabatan Perpaduan Negara dan Integrasi Nasional (JPNIN) dan Yayasan Sukarelawan Siswa (YSS) melaksanakan **Program Jalinan Integrasi Mahasiswa atau Misi Sukarelawan Siswa di Pengkalan Hulu ini pada tahun hadapan**. Melalui pelaksanaan program seperti ini, generasi muda dapat mengenali lebih dekat warisan, adat resam dan budaya masyarakat Siam di Malaysia.
11. Bagi meningkatkan promosi dalam platform media perdana dan media sosial berhubung kepelbagaian etnik di negara ini, Kementerian akan juga menerbitkan **Dokumentari Budaya Etnik Minoriti terutama melibatkan etnik Siam, Portugis, Cheti, Bajau, Orang Ulu Sarawak dan masyarakat Semai**.

PENUTUP

Hadirin yang saya muliakan sekalian,

12. Perpaduan adalah asas kepada kejayaan kita, dan kita mesti terus menjaga semangat perpaduan ini dalam semua aspek kehidupan. **Perayaan Songkran adalah contoh yang baik**

tentang bagaimana kita boleh meraikan perbezaan, menghormati satu sama lain, dan menjaga keharmonian dalam negara yang berbilang kaum ini.

13. Akhir kata, saya ingin mengucapkan setinggi-tinggi penghargaan kepada semua yang terlibat dalam penganjuran Perayaan Songkran pada tahun ini. Semoga perayaan ini bukan hanya memberikan kegembiraan, tetapi juga mengingatkan kita tentang pentingnya perpaduan, keharmonian, dan saling menghormati dalam kehidupan kita.

Dengan ini, saya dengan sukacitanya **merasmikan Perayaan Songkran Peringkat Kebangsaan 2025.**

Selamat Menyambut Songkran! Sawadee Pee Mai!

Sekian, terima kasih.